

Сургъулин түрүн өдр

Дундин школта баахн селән. Школин заведующ Григорий Адъянович Манжиков өрүн-өрлэ болсн бийнь школур ирдж: энүнд, школ ода бийнь бичкдүдиг орулдж авхдан белн болад уга болдж медгднэ. Сургъулин джилин түрүн өдриг сәәнәр эклхд бички болв чигн дуту-дунд бәәдг болвзго гисн ухагъар, эн даки нег школин классмуд эргәд хәләв.

Эврәннь шуугата, альви бички эздүдән тосдж авхдан школ кесг өдрәс нааран белн. Григорий Адъянович, энүнә хөрн тавдгч сургъулин джил эклджәсн бийнь, чееджин невчки киләстә болв, юнъгад гихлә, школин үүд шинәс алхдж, негдгч класст ордж, хальмг келәр сургъуль сурх 18 бички күүкд ирхинь күләджәнә.

Эврә хальмг келәр бичкдүд сургъджагъад, ик завсрлгънд гархларн, багш эврәннь кеджәх кәдлмшиннь аш-тусинь боли эн ик ачта керг күүцәхднэ энүнә өмн зовлн харгъхинь ухалдж санх.

Болв, багш талдан нег уха бас ухалв: эндр сургъуль эклдж сурджах бички кәзүд, күүкдин оlnь магъд уга ик гүн сургъульта әмтс болдж өсәд, мана культуриг, эдлахуг эврәннь гартан авцхах. Эднәс зәрмнь сургъулән чиләгъад, сургъулин багш болад, гарсн хотндан ирәд, тү-

рүн урок сургъульчиртан заахларн, эркән уга эврәннь сургъульд орсн түрүн өдрән болн түрүн багшан санх, — гисн ухан орхла, багшин чирәннь байсна...

Өрүн долан часла, ке хуван өмсцхәсн, кәвүднэ үсән ахрар киргәсн, оln күүкд школур цуглрцхав. Эдн дунд негдгч классин бичкдүд ончтагъар үзгднә, эдн — гиичд ирсн мет эмәлдәд, энд-тендән соньмсдж хәләлдәд, хонъхин ә гархинь күләлдәд бәәцхәнә. Күләджәсн хонъхнэ джинънв.

Түрүн урок эклв, негдгч классникудт школин диг-дара, сургъульчир бийән ягъдж школд бәрхин тускар цәәлгъдж өггдв. Бичкдүд номгъар суугъад, багшин келсиг икәр оньган өгч соньсцхав. Нам Толя кәвүн, крандашан унгъагъад, багшин үг соньсхд ә татснд, түүг му нүдәр хәләцхәв.

Школин хонъх, әлдәгъурчилсн медгдл уга түрүн урок төгсснә ә өгв. Күүкд шуугатагъар газа гарад, оln наад наадцхав. Түүнә хөб хойрдгч, арифметикин урок эклв.

Иигдж, Приютненск района 1-ч Улдчнә эклц школин сургъулин түрүн өдр негдгч хальмг классд эклв.

Е. ШУРГУЧИНОВА,
багширин эрдм-сургъуль
өбдәлүллгәнә институтин
директорин дарук.